

Ukamilifu wa Kimaadili na wa Kiroho Umeahidiwa

Zaidi ya hayo yote jivikeni upendo, ndio kifungo cha ukamilifu. Na amani ya Kristo iamue mioyoni mwenu; ndiyo mliyoitiwa katika mwili mmoja; tena iweni watu wa shukrani—Wakolosai 3:14, 15.

“Basi, vifisheni viungo vyenu vilivyo katika nchi,” Paulo aliwaandikia Wakolosai; “Katika hayo ninyi nanyi mlitembea zamani, mlipoishi katika hayo. Lakini sasa yawekeni mbali nanyi haya yote, hasira, na ghadhabu, na uovu, na matukano, na matusi vinywani mwenu.... Basi, kwa kuwa mmekuwa wateule wa Mungu, watakatifu wapendwao, jivikeni moyo wa rehema, utu wema, unyenyekevu, upole, uvumilivu, mkichukuliana, na kusameheana, mtu akiwa na sababu ya kumlaumu mwenzake; kama Bwana alivyowasamehe ninyi, vivyo na ninyi” (Wakolosai 3:5, 7–13)....

Barua kwa Wakolosai imejawa na mafundisho ya thamani kubwa kwa wote ambao wamejihusisha katika kazi ya Kristo, masomo ambayo yanaonesha umakini katika lengo na ubora wa kusudi ambalo litaonekana katika maisha ya yule anayemwakilisha Mwokozi ipasavyo. Akiyakataa yote ambayo yatamzuia asifanikiwe katika mahusiano na mbingu au ambayo yatageuza miguu ya mwingine kutoka katika njia nyembamba, muumini atafunua katika maisha yake ya kila siku rehema, utu wema, unyenyekevu, upole, uvumilivu na upendo wa Kristo...

Katika juhudi zake ili kufikia ukamilifu aliokusudia Mungu kwa ajili yake, Mkristo hapaswi kukatishwa tamaa na cho chote. Ukamilifu wa maadili na wa kiroho, kwa njia ya neema na nguvu ya Kristo, ni ahadi iliyotolewa kwa wote. Yesu ni chanzo cha nguvu, chemchemi ya uzima. Anatuleta katika Neno Lake na kutoka kwenye mti wa uzima anatuletea majani kwa ajili ya uponyaji wa roho zenye ugonjwa wa dhambi. Anatuongoza kwenye kiti cha enzi cha Mungu na kuweka vinywani mwetu ombi ambalo kwalo tunaletwa katika muungano wa karibu pamoja na Yeye Mwenyewe. Kwa niaba yetu Anaweka kazini mawakala wa mbinguni wenye uwezo wote. Katika kila hatua tunagusa nguvu Yake ya uzima.

Mungu haweki kikomo katika maendeleo ya wale ambao wanatamani wa “jazwe maarifa ya mapenzi yake katika hekima yote na ufahamu wa rohoni” (Wakolosai 1:9). Kwa njia ya maombi, kwa njia ya kukesha, kwa njia ya kuongezeka katika maarifa na uelewa, wanapaswa “kuwezesha kwa uwezo wote, kwa kadiri ya nguvu ya utukufu wake” (aya ya 11). Ndivyo wanavyoandaliwa kufanya kazi kwa ajili ya wengine. Ni kusudi la Mwokozi kwamba wanadamu wakiwa wamesafishwa na kutakaswa, wawe mkono Wake wa msaada. Kwa ajili ya fursa hii kuu hebu na tumshukuru Yeye ambaye “amewastahilisha kupokea sehemu ya urithi wa watakatifu katika nuru. Naye alituokoa katika nguvu za giza, akatuhamisha na kutuingiza katika ufalme wa Mwana wa pendo lake” (aya ya 12, 13) (The Acts of the Apostles, 477, 478).